



Komunikadu Imprensa
02 Juñu 2023

**Selebra loron Internasionál Labarik:
JSMP kongratula labarik sira no Ejije Estadu Fornese Kondisaun ne'ebé
adequadu ba labarik sira**

Iha 01 Juñu mundu Internasionál selebra loron internasionál labarik nian hodi kongratula labarik hotu iha mundu hanesan loron espesial labarik nian hodi fó hanoin ba labarik sira kona-ba sira nia direitu hanesan direitu atu hetan edukasaun, hetan tratamentu saúde, justisa, sosiál no direitu sira seluk ne'ebé konsagra ona iha konstituisaun RDTL, lei sira inklui iha konvensaun ba Direitu Umanu ne'ebé Timor-Leste ratifika ona iha 2003. Iha tinan ida ne'e, Estadu Timor-Leste komemora loron internasionál labarik ho tema "Família Nu'udar Nukliu Prinsipal ba Protesaun Dezenvolvimentu Labarik" no ho nia sub tema "Promove ai-han lokál Nutritivu ba Labarik nia Dieta Saudavél".

Hanesan kumprimisiu estadu Timor-Leste atu bele asegura, promove no proteze labarik sira nia direitu, iha Feveireu 2023, Parlamentu Nasionál aprova ona Lei Nú 6/2023 kona-ba protesau labarik no foin sa'e iha perigu ne'ebé apresenta husi governu hodi regula kona-ba definisaun ba labarik no oinsá labarik sira bele hetan protesau espesial no mós protesau sosiál. JSMP espera katak ho lei protesau labarik no foin sa'e iha perigu bele tulun governu fasilita kondisaun ne'ebé adequadu ba labarik sira hodi ezerse sira nia direitu sira ne'e hotu.

Iha parte seluk, JSMP kontinua husu ba governu no Parlamentu Nasionál atu bele asileira ona lei kona-ba justisa juvenil ne'ebé importante tebes hodi tulun no asegura prosesu sira justisa formál hasoru labarik sira ne'ebé konfliktu ho lei alende ne'e alterasaun ba Kódigu Penál ne'ebé iha provizaun lubuk ne'ebé JSMP konsidera falla atu proteje adekuadamente labarik no la iha konsisténsia ho Timor-Leste nia obrigasaun tuir Konstituisaun no lei internasionál.

"Iha Komemorasaun ba loron internasionál labarik ne'e, JSMP husu ba governu no Komisaun A ne'ebé trata ba asuntu konstutisionais no justisa, Parlamentu Nasionál atu bele aseleira lalais esbosu lei juvenil nomós alterasaun ba Kódigu Penál bazeia ba paraser ne'ebé prepara husi Sekretaria Estadu Igualdade ho inkluzau hamutuk ho ONG nasionál hanesan JSMP, Fokupers, no ALFela ho apoiu husi Fundasaun Ázia liuhusi programa Nabilan, prepara no apresenta ona ba Parlamentu Nasionál komisaun A iha ínisu tinan ida ne'e," dehan Sra. Ana Paula Marçal, Diretora Ezekutiva JSMP.

Rua Beco Lakateu, Aldeia Manufuik, Suku Kolmera,
Sub-distritu Vera Cruz Munisípiu Dili
PoBox: 275
Telefone: 3323883 |77040735
www.jsmp.tl
info@jsmp.tl
Facebook: www.facebook.com/timorleste.jsmp

JSMP nia ejizensia ne'e kaer metin ba konstituisaun RDTL kona-ba Sidadaun hotu hotu iha direitu atu hetan assistensia sosial no seguransa halo tuir lei nomos tuir konvensaun internasionál kona-ba direitu ba labarik ne'ebé deskreve labarik sira tanba seidak iha maturidade física no mental presiza hetan protesaun no kuidadu espesial, inklui protesaun legal ne'ebé apropiadu, molok no hafoin moris.

JSMP hakarak hatu'o parabéns ba labarik sira iha mundu tomak, liu-liu ba labarik sira iha Timor-Leste ne'ebé celebra loron espesial ba labarik nian no hein katak iha loron internasionál ba labarik ida ne'e, ema hotu hamutuk luta kontra violensia oioin no diskriminasaun hotu hasoru labarik sira iha Timor-Leste.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Email: ana@jsmp.tl

Website: <https://jsmp.tl/>